



Surdatta lavurs da progettaziun - sablunera aua da baiver Sarsura, Zernez

In connex culla progettaziun da l'ouvra electrica Sarsura esa planisà da rimplazzar e reparar eir la sablunera. Per realisar quist intent esa necessari da laschar valutar ed examinar quai chi riguarda l'aua da baiver ad ün perit. I's tratta d'üna lavur complessiva per ün'examinaziun concepziunala da tuot la rait da l'aua da baiver da l'inchaschamaint Sarsura fin i'l reservuar Vallatscha da Zernez. La suprastanza cumünala ha surdat l'incumbenza per quist preproget a la firma Uli Lippuner AG, Maiavilla.

Surdatta da lavur da progettaziun - rondella Lavin vest

In connex cul proget nouv dal stabilimaint pels trens da salvamaint e d'emergenza da la Viafier Retica chi'd es previs da fabricar a Lavin, Crusch, da la vart sura dal sviamaint, es gnü miss in vista la dumonda da l'access existent chi maness fin pro'l stabilimaint surmanzunà. Cun quai haja dat la discussiun tanter il Cumün da Zernez, la Viafier Retica e l'Uffizi da construcziun bassa dal chantun Grischun da pudair proseguir cun ün access nouv. Per realisar quel access füss necessari da construir üna rondella a Lavin vest. La lavur per la progettaziun es gnüda surdatta al büro Caprez SA, Silvaplana.

Pumpiers Zernez - contrat culla GVG GR a regard salvamaint sün vias

La sgüranza d'edifizis dal Grischun (GVG) ha elavurà il nouv contrat chi regla ils detagls sco l'organisaziun, drets e dovairs dal salvamaint sün vias in nossa regiun. I'l contrat es nouv eir integrà la part dal tunnel OEE Munt La Schera. Il contrat correspondent es gnü sancziunà.

Proget Via Maistra – proseguimaint progettaziun

Cun quai chi ha dat intervenziuns cunter il proget Via Maistra impustüt regard la canera ha l'Uffizi da construcziun bassa dal chantun Grischun stuvü laschar far üna perizia da canera correspondent. Quista perizia ha manà a la conclusiun cha'l chantun sto relaschar üna zona cun sveltezza 30 sülla via maistra illa fracziun da Zernez. La suprastanza cumünala ha acconsenti il sböz da la perizia per üna zona 30 sur tuot la fracziun da Zernez sco eir il plan da terminis. Plünavant es gnü decis da laschar far las calculaziuns da differenza da cuosts a regard las variantas da dürada d'execuziun dal proget, sur duos o sur quatter fin tschinch ons.

Insembel cun l'Uffizi da construcziun bassa dal chantun Grischun vain organisà ils 18 avuost 2021 üna sairada d'infuormaziun per cha la populaziun as possa infuormar detagliadamaing davart il proget. Scha las circostanzas regard il coronavirus nu laschan pro daraja üna dieta d'infuormaziun.

Terrain da fabrica Ruzön III - vendita parcella no. 217

La suprastanza cumünala propuona a man da la votaziun a l'urna dals 25 avrigl 2021 da vender la parcella no. 217. In quel lö dess gnir realisà ün abitacul cun raduond 14 abitaziuns.

EW Zernez - fracziun da Brail - progets e decisziuns 2021

La suprastanza cumünala ha deliberà las parts dal credit complessiv ed approvà la finanziaziun sur il credit dal „EW Süd“. I's tratta d'ün credit da 215'000 chf per l'attach da la lingia da 16 kV da cabel da las OEE SA (Einschlaufung). Il segund credit sur 140'000 chf es pensà pel rimplazzamaint e schlargiamaint dal scumpart da la mezza tensiun illa staziun da transfuormaziun TS Brail. Causa il grond svilup da fabrica in Ils Muots, Brail es da rinforzar quista part dad Ils Muots vest cun üna cabina da scumpart nouva e culs attachs correspondent. La suprastanza propuona a man da la votaziun a l'urna dals 25 avrigl 2021 da deliberar la dumonda da credit da 145'000 chf.

Proget „Carta da giasts“ ed augmaint da las taxas da cura

La TESSVM ha elavurà ün concept per üna sporta chi pussibiltescha ils giasts il far adöver dal trafic public. La suprastanza cumünala ha approvà il proget „Carta da giasts“ chi cumpiglia l'utilisaziun dal trafic public da S-chanf fin Ardez, fin sül ospiz dal Flüela e sül ospiz dal Pass dal Fuorn. Quai per giasts da l'hotellaria e da la parahotellaria cun cuosts da previsibelmaing 157'138.00 chf l'on. In ün prüm pass ha lö üna fasa da pilot dals 1-11-2021 fin ils 31-10-2023. Per pudair finanzia il proget ha la suprastanza cumünala deliberà ün credit da 35'000 chf per l'on 2022 e 5'000 chf per l'on 2021. Inavant es gnü decis d'augmantar las taxas da cura, i'l rom cha la ledscha lascha pro süls 1-11-2021. In avegnir dess esser il böt da pudair cuvernar ils cuosts culla nouva ledscha da turissem.

Controlla da gestiun 9 e 10 november 2020

Al cumanzamaint da november 2020 ha fat la cumischiun sindicatoria la controlla da gestiun. La direcziun operativa ha tut in consegna la notizcha d'acta e tilla ha trattada. La resposta es gnüda preschantada ed approvada da la suprastanza.

Ouvra electrica Susasca Susch (OESS SA) - reelecziuns i'l cussagl administrativ

La suprastanza cumünala propuona a la radunanza generala da las OESS SA da reelegger ad Emil Müller sco president ed a Seraina Bickel e Stefan Bühler sco commembers dal cussagl administrativ.

Büro electoral per las votaziuns cumünalas dals 25 avrigl 2021

La suprastanza cumünala ha elet il büro electoral per las votaziuns dals 25 avrigl 2021. Al büro electoral fan part: Emil Müller sco president, Brigitta Enkerli, Seraina Bickel e Corsin Scandella sco actuar.

Iniziativa „Per üna scouline a Lavin“

Als 1. marz 2021 es entrada ün'iniziativa dal pövel suottascritta da 264 personas cun dret da vuschar cumünal. Principalmaing pretenda l'iniziativa cha la scouline a Lavin vain mantgnüda. L'iniziativa es gnüda controllada e las suottascripziuns sun gnüdas verificadas. La suprastanza cumünala ha tut cogniziun da l'iniziativa ed invia ils pass necessari d'elavuraziun.